

Aen Vanjvei Lienzvuen Ndwencieng Vahcuengh Guengjsae Youq Sanglinz Yen Gawjbanh

广西首届壮语春晚在上林成功举行

□ boujbauq gicej Mungz Sugij Cioz Yuogj



▲ Bouxmaenh Bouxcuengh Lanz Gvangbingz yienj caij gyaeggaeq.

◀ Gyonghoih Boux-cuengh yiengjbumbum.

▲ Luz Cwngsin caeuq dahniq Bouxcuengh Cioz Veigiz ciengq diuz go 《Mancuengh Mbinfwfw》.

1 nyied 15 hauh, aen vanjvei lienzvuen ndwencieng Vahcuengh gaiq daih' it (Guengjsae) Cungguk youq Nanzningz Si Sanglinz Yen gawjbanh, Swcigih Minzyijveij fucujyin Yi Siz, Sanglinz Yen yencangj Lanz Cunghwngj daengj lingjdauj caeuq dangdieg ganbu ginzung gaenh fanh bouxvunz youq yienhciegz yawjngonz le vanjvei.

Vanjvei aeu "ranzcoj Bouxcuengh cuengqlangh siengjmuengh" guh cawjdaez, doenggvaq "cingz Mbanjcuengh", "loq minzcuz", "hoenz Betgveiq" sam duenh baijlangh bya heu raemx saw, gingj gyaue vunz ndei Diegcuengh raeuz. Mehmbwk Bouxcuengh Veiz Cingzcingz ciengq 《Gogingqlaeuj》, lwnhgangj vunz Bouxcuengh haisim eufwen angqcoux bouxhek aen gingjsaek neix; Veiz Suzyingh, Cioz Haijdauh daengj geij boux fwenvuengz Bouxcuengh hwnj daiz eu fwen, goenghoh daihgya bi moq angq ndangdaej cangq; bouxmaenh ndawbiengz Majsanh, Sanglinz Yen doenggvaq 《Dimhcuk》、《Dwklongj Bouxcuengh》、《Fwenrauqnaz》、《Yaem Gyaep Cingz Mbanj》, dawz gij saeh vunz Bouxcuengh raeuz gaenx guh hongnaz, maij eufwen diuqfoux haenx lwnh hawj vunzlai; 《Son Mwngz Gangj Vahcuengh》、《Mancuengh Mbinfwfw》、《Fwen Couxhek》、《Goreux Haiva》 daengj mboujdan daiq bouxhek hauej Mbanjcuengh youzlangh, hix sawj goengqde yiengjsouh daengz vwnzva Bouxcuengh naekna dangqmaz dem. 《Caemhsim Caez Guh Siengjmuengh Cungguk》 yungh Fwencuengh cienzciengq siengjmuengh Cungguk, lwnhgangj gij maqmuengh guekgia fouqgiengz, minzcuz hwng-vuengh, yinzminz vuenyungz. Gaenriengz diuzgo 《Ranzcoj Bouxcuengh》 youz bouxmaenh eufwen Guengjsae Vangz Cunhyen ciengq haenx, daengx aen vanjvei swnhleih hai sat.

Ciengz vanjvei neix lij youq samcib lai aen vangjean, veihsin bingzdaiz guh cigboq. Bouxyawj mbouj ndaej daengz yienhciegz haenx caenh' aeu hai soujgih, dennauj couh ndaej yawj aen vanjvei Vahcuengh neix. Haemh haenx, miz baenz gvaq cien fanh vunz yawjngonz le vangjloz cigboq.

Cunghyangh Minzcuz Dayoz saujsu minzcuz vwnzyoz yenzgiu daihsae, boux yozcej mizmingz Guengjsae Liengz Dingzvang gyaousou sij Sawcuengh hawj aen vanjvei Vahcuengh neix: "Angqhoh Bouxcuengh raeuz caeuq beixnuengx gak minzcuz,

bouxbox ndang ak, ranzranz vuenyungz, mbanjmbanj fatcaiz, gizgiz bingzan, caez byaij ngoenz ndei goksasa!" Cunghyangh Minzcuz Dayoz nyuenz fuyaucangj, Baekging Guengjsae Vwnzva Yisuz Cuzcinvei veicangj Vangz Fungyenj youq yienhciegz yawj vanjvei le haenh aen vanjvei Vahcuengh neix guh ndaej baenz yienj ndaej ndei, nyinhnaeuz gijneix dwg aen gidij dijen Guengjsae gvancez lozsiz Siz Ginbingz cungjsuhgi "seiq aen gagsaenq" ndawde aen "vwnzva gagsaenq" haenx. Guengjsae Samnyiedsam Cazcise cungjbenhciz Cioz Siengzcouh naeuz, aen vanjvei Vahcuengh neix neiyungz lai, suiibingz sang, hawj vunz daengx biengz yawjraen gij vwnzva Bouxcuengh lai cungj lai yiengh raeuz. Maqmuengh baezlaeng lij ndaej yawj cezmuz Vahcuengh engq lai, muenxcuk yinzminz Bouxcuengh vwnzva iugouz, vih coicaenh minzcuz doxgiat, sevei onjdingh caeuq bien' gyaiq ancienz guh'ok gungyen.



▲ Fwenvuengz Vahcuengh soengq hokfuk.



▲ Bonjsenhconz, mbawdan cezmuz caeuq gunghcozcnwng cungj yungh Sawcuengh Sawgun daeuj sij.



▲ Vangz Cunhyen youq gwnz vanjvei ciengq 《Mbanjcuengh Gyaue》、《Ranzcoj Bouxcuengh》, vunzlai bekfwnz yiengjbaba.



▲ Eu fwenyoux.

◀ Lwgnyez Bouxcuengh diuq-foux angqyangyang.